

四庫全書

集部

欽定四庫全書

集部  
宋文紀卷十五

詳校官庶吉士<sub>臣</sub>瑚圖禮

主事銜<sub>臣</sub>徐以坤覆勘

總校官進士<sub>臣</sub>楊懋珩

校對官中書<sub>臣</sub>李斯咏

謄錄監生<sub>臣</sub>劉清礪

欽定四庫全書

宋文紀卷十五

明梅鼎祚編

王僧達

太保弘少子歷遷中書令坐悖逆賜死

求徐州啓

僧達自負才地謂當時莫及上初踐阼即居  
端右一二年間便望宰相及爲護軍不得志  
乃啟求徐州不許僧達三啟固讓上  
甚不說以爲征虜將軍吳郡太守

臣哀索餘生逢辰藉業先帝追念功臣睠及遺賤飾短  
捐陋布策稠采從官委褐十有一載早馮慶泰脫親盛

明而有志於學無獨見之敏有務在身無偏鑒之識固不足建言世治備辯時宜竊以天恩不可終報尸素難可久處故猖狂蕪謬每陳所懷陛下孝誠發衷義順動物自龍飛以來實應九服同歡三光再朗而臣假視蒼里借聽民謠黎氓缺

未締其感遠近風議不獲稍

進臣所用夙宵疾首寤寐疚心者也臣取之前載譬之於今當漢文之時可謂籍已成之業據既安之運重以布衣菲食憂勤治道而賈誼披露乃誠猶有歎哭之諫

况今承顛沛萬幾惟始恩未及普信未遑周臣又聞前  
達有言天下重器也一安不可卒危一危亦不可卒安  
陛下神思淵通亦當鑒之聖慮竊謂今之務惟在萬有  
爲已家國同憂允彼庶心從民之欲民有咨瘼之聲君  
表納隍之志下有愆弊之苦上無侈豫之情又應官酌  
其才爵疇其望與實不賞寧失不刑至若樞任重司藩  
扞要鎮治亂攸寄動靜所歸百度惟新或可因而弗革  
事在適宜無或定其出處天下多才在所用之臣非惟

寄觀世路謬識其難卽之於身詳見其弊何者臣雖得  
免墻面書不入於學伍行無愆戾自無近於才能直以  
廕託門世夙列縈齒且近雖奔迸江路歸命南闕竟何  
功效可以書賞而頻出內寵陛下綢繆數旬之中累發  
明詔自非才略有素聲實相任豈可聞而弗驚履而無  
懼固宜退省身分識恩之厚不知報荅當在何期夫見  
危致命死而後已皆殷勤前誥重其忘生臣感先聖格  
言思在必効之地使生獲其志死得其所如使臣享厚

祿居重榮衣狐坐熊而無事於世者固所不能安也今  
四夷猶警國未忘戰辮髮凶詭尤宜裁防閒者天兵未  
獲已肆其輕漢之心恐戎狄貪恧猶懷匪遜脫以神州  
暫擾中夏兵饑容或遊魂塞內重窺邊壘且高秋在節  
塞馬興威宜圖其易早爲之所臣每一日三省志在報  
效遠近小大顧其所安受效偏方得司者則慮之所辦  
情有不疑若首統軍政董勒天兵既才所不周實誠亦  
非願陛下矜諒已厚願復曲體此心獲軍之任臣不敢

處彭城軍府即時過立且臣本在驅馳非希崇顯輕智  
小號足以自安願垂鑑恕特賜申獎則內外榮荷存沒

銘分

宋書

請解職表

僧達初求徐州世祖不許以爲吳郡太守彌不得意坐事免孝建三年除

太常意尤不悅久之上表解職文旨抑揚侍中何偃以詞不遜啟付南臺免官大明二年

遷中書令

臣素審庸短少闕宦情兼宿抱重疾年月稍甚生平素  
念願閒衡廬先朝追遠之恩早見榮齒曩者以親貧須



養僂俛從祿解褐後府十有餘旬俄遷舍人殆不朝直  
實無緣坐閱宸寵尸爵家庭情計二三屢經聞啓終獲  
允亮賜反初服還私未用又擢爲洗馬意旨優隆其令  
且拜許有郡缺當務處置會瑯琊遷改即蒙敕往反神  
翰慈誘殷勤令裝成即自隨靈寶往年淪覆長溪因彼  
散失仰感沉恩俯銘浮寵臣釁積禍升仍丁艱罰聊及  
視息即蒙逮問具啓以奉營情事負舉猥多賜蒞宣城  
極其窮躋仲春移任方冬便值敵南侵臣忝同肺腑情

爲義動苦求還都侍衛輦轂至止之日戎旗已舉在郡  
雖淺而貪得分了方拂農衣還事耕牧宣城民庶詣闕  
見請爾時敕亡從兄僧綽宣見留之旨閭疾寡任野心  
素積仍附啓苦乞且旋任還務未期亡兄臣錫奄見棄  
背啟解奔赴賜帶郡還都曾未淹積復除義興臣自天  
飛海泳豈假鱗翼徒思橫施與日而深自處官以來未  
嘗有涓毫之積羸疾閭疚又無人一諾而性狎林水偏  
愛禽魚議其所託動乖治要故收崖歛分無妄俄頃實

由有待難供上裝未立東郡奉輕西郊祿重具陳蘄懇  
備執初願置乞江湘遠郡一二年中庶反耕之日糧藥  
有寄即蒙亮許當賜矜擢遭逢厄運天地崩離世蒙聖  
朝門情之顧及在臣身復荷殊識義雖君臣恩猶父子  
臣誠愚蔽心過草木奉衛之日不覺捐身單驅弱嗣千  
里共氣繼惟凶塗動臨危盡生微朝露不察如絲信順  
所扶得獲全濟再見天地重覩三光于時兄子僧亮等  
幽窘醜逆盡室獄戶山川嶮阻吉凶路塞悠遠之思誰

能勿勞嘗膽濡足是其公願分心挂腹寔亦私苦幸屬  
聖武剋復大業宇宙廓清四表靖晏臣父子叔姪同獲  
泰辰造情追尋歸骨之本欲以死明心誤有餘辰情願  
已展避逆向順終古常節智力無効有何勲庸而頻煩  
恩榮動踰分次但忽病之日不敢固辭故吞訴於鵲渚  
飲愧於新亭及元凶既殄人神獲乂端右之授即具陳  
請天慈優渥每越常倫南蠻護軍旬月私授臣三省非  
分必致孤負居常輕任尚懼網墨況參要內職承寵外

畿其取覆折不假識見故披誠啟訴表疏相屬或乞輕  
高就卑或願以閒易要言誓致苦播於辭牘誠知固陋  
當觸明科去歲往年累犯刑禁理無申可罪有恒典虛  
穢朝序慙累家業臣甘其終物議其盡陛下棄其身瑕  
矜其貴膝迂略法憲曲相全養臣一至之感口此何忘  
利伊恩升加以今位當時震驚收足失所本忘閉情不  
敢聞命內慮於已外訪於親以爲天地之仁施不期報  
再造之恩不可妄屬故洗拂灰壤登沐膏露上處聖澤

下更生辰合芳離蛻遐邇改觀但偷榮託幸忽移此歲  
自見妨長轉不可寧宜其沉放志事俱盡伏願陛下承  
太始之德加成物之恩及臣狂蔽未至得於榮次自引  
聖朝厚終始之惠孤臣保不泯之澤夫讓功爲高臣無  
功而讓專爲美臣榮采已積以是求退誠亦可慙又  
妻子爲居更無餘累婢僕十餘粗有田八歲時是課足  
繼朝昏兼比日眩瞽更甚風虛漸劇湊理合閉榮衛悒  
底心氣冲弱神志衰散念此根疵不支歲月公私誠願

宜蒙諒許乞徇餘辰以終瑣運白水皎日不足爲譬願  
垂矜鑑哀申此請

與盱眙太守沈璞書

僧達爲宣城太守與璞書  
時璞有破敵功詳始興王

足下何如想館舍正安士馬無恙離析有時音旨無日  
憂詠沈吟增其勞望間者獯獫虓橫掠剝邊鄙郵販絕  
塵坰介靡達瞻江盼淮眇然千里吾聞涇陽梗棘伊滑  
苻遁烏集絃絕患深自古承知乃昔寇苦城境勝胄朝  
飡伍甲宵舍烽鼓交警羽鏑駟合而足下砥兵礪伍總

厲豪彥師請一奮氓無貳情遂能固孤城覆嚴對陷死  
地覲生光古之田孫何以尚茲商驛始通粗知梗槩崇  
讚膽智嘉賀文猛甚善甚善吾近以戎暴橫斥規效情  
命收龜落簪星舍京里既獲遄至代馬卷迹支離霑德  
復繼前緒行葦之懽實協初慮但乖塗重隔顧增慨涕  
比恒疾卧憂委兼疊裁書送想無數久懷

並宋書

祭顏光祿文

維宋孝建三年九月癸丑朔十九日辛未王君以山羞



野酌敬祭顏君之靈嗚呼哀哉夫德以道樹禮以仁清  
惟君之懿早歲飛聲義窮幾畝文蔽班揚性倬剛潔志  
度淵英登朝光國實宋之華才通漢魏譽浹龜沙服爵  
帝典栖志雲阿清交素友比景共波氣高叔夜嚴方仲  
舉逸翮獨翔孤風絕侶流連酒德嘯歌琴緒游顧移年  
契闊宴處春風首時爰談爰賦秋露未凝歸神太素明  
發晨駕瞻廬望路心悽目泣情條雲互涼陰掩軒娥月  
寢耀微燈洞光几牘誰照衾衽長塵絲竹罷調擘悲蘭

字肩涕松嶠古來共盡牛山有淚非獨昊天殲我明懿  
以此忍哀敬陳奠饋申酌長懷顧望歔歔嗚呼哀哉

丘珍孫

寧朔將軍

與王僧達書

褚伯玉字元璩吳郡錢塘人居剡瀑布山三十餘年隔絕人物僧達爲吳郡苦禮致之停郡信宿裁交數言而退珍孫與僧達書僧達答之

聞褚先生出居貴館此子滅景雲棲不事王侯抗高木  
食有年載矣自非折節好賢何以致之昔文舉棲冶城

安道入昌門於茲而三焉夫却粒之士食霞之人乃可  
暫致不宜久羈君當思遂其高步成其羽化望其還策  
之日暫紆清塵亦願助爲譬說

南齊書

王僧達答丘珍孫書

褚先生從白雲遊舊矣古之逸民或留慮兒女或使華  
陰成市而此子索然惟朋松石介於孤峰絕嶺者積數  
十載近故要其來此冀慰日夜比談討芝桂借訪薜蘿  
若已窺煙液臨滄洲矣知君欲見之輒當申譬

南齊書

顏竣

字士遜延之子歷丹陽尹右將軍出爲東揚州刺史坐罪賜死

魏互市議

元嘉二十八年魏自彭城北歸復求互市竣爲北中郎府主簿議

愚以爲與魏和親無益已然之明效何以言其然夷狄之欲侵暴正苦力之不足耳未嘗拘制信義用輟其謨昔年江上之役乃是和親之所招歷稔交聘遂求國婚朝廷羈縻之義依違不絕既積歲月漸不可誣人心無厭重以忿怒故至於深入幸今因兵交之後華戎隔判若言互市則復開曩敝之萌議者不過言互市之利在

得馬今棄此所重得彼下駟千匹以上尚不足言況所得之數裁不十百耶一相交關卒難閉絕寇負力玩勝驕黠已甚雖云互市實覘國情多贍其求則桀傲固已通而爲節則必生邊虞不如塞其端漸杜其缺望內修德化外經邊事保境以觀其釁於事爲長

鑄錢議

元嘉中鑄四銖錢輪郭形制與五銖同用費損無利故百姓不盜鑄及世祖卽

位又鑄四銖孝建三年徐爰議繕鑄納贖詔可錢形薄小於是民間盜鑄雜以鉛錫人剪鑿古錢以取其銅錢轉薄小百物踊貴乃立品格悉加禁斷沈慶之江夏王義恭及竣並

有議時以銅轉難得欲鑄二銖錢又議至前  
廢帝時鑄二銖錢式益細慶之又啓通私鑄  
由是錢  
貨敗亂

尚書右丞徐爰收銅繕鑄納贖議

貴貨利民載自五政開鑄流圜法成九府民富國實教  
立化光及時移俗易則通變適用是以周漢倣遷隨世  
輕重降及後代財豐用足因條前寶無復改初年歷既  
遠喪亂屢經堙焚剪毀日月消減貨薄民貧公私俱困  
不有革造將之大乏謂應或遵古典收銅繕鑄納贖刊

刑著在往策今宜以銅贖刑隨罰爲品

始興郡公沈慶之聽民鑄錢議

世祖下其事公卿議

昔秦幣過重高祖是患普令民鑄改造榆莢而貨輕物重又復乖時太宗放鑄賈誼致譏誠以采山術存銅多利重耕戰之器曩時所因四民競造爲害或多而孝文弗納民鑄遂行故能朽貫盈府天下殷富況今耕戰不用采鑄廢久鎔冶所資多因成器功艱利薄絕吳鄧之資農民不習無釋耒之患方今中興開運聖化維新雖

復偃甲銷戈而倉庫未實公私所乏唯錢而已愚謂宜聽民鑄錢郡縣開置錢署樂鑄之家皆居署內平其準式去其雜僞官歛輪郭藏之以爲永寶去春所禁新品一時施用今鑄悉依此格萬稅三千嚴檢盜鑄并禁剪鑿數年之間公私豐贍銅盡事息姦僞自止且禁鑄則銅轉成器開鑄則器化爲財剪華利用於事爲益

太宰江夏王義恭議

伏見沈慶之議聽民私鑄樂鑄之室皆入署居平其準



式去其雜僞愚謂百姓不樂與官相關由來甚久又多  
是人士蓋不願入署凡盜鑄爲利利在僞雜僞雜既禁  
樂人必寡云歛取輪郭藏爲永寶愚謂上之所貴下必  
從之百姓聞官歛輪郭輪郭之價百倍大小對易誰肯  
爲之強制使換則狀似逼奪又去春所禁新品一時施  
用愚謂此條在可開許又云今鑄宜依此格萬稅三千  
又云嚴檢盜鑄不得更造愚謂禁制之設非惟一旦昧  
利犯憲羣庶常情不患制輕患在冒犯今入署必萬輸

三十私鑄無十三之稅逐利犯禁居然不斷又云銅盡  
事息姦僞自禁愚謂赤縣內銅非可卒盡比及銅盡姦  
僞已積又云禁鑄則銅轉成器開鑄則器化爲財然頃  
所患患於形式不均加以剪鑿闕鉛錫衆所耳越若  
此於盜鑄銅者亦無須苦禁

顏竣議

時爲吏部尚  
書兼領軍

泉貨利用近古所同輕重之議定於漢世魏晉以降未  
之能改誠以物貨既均改之僞生故也世代漸久弊運

頓至因革之道宜有其術今云開署放鑄誠所欣同但慮採山事絕器用日耗銅既轉少器亦彌貴設器直一千則鑄之減半爲之無利雖令不行又云去春所禁一時施用是欲使天下豐財若細物必行而不從公鑄利已既深情僞無極私鑄剪鑿書不可禁五銖半兩之屬不盈一年必至於盡財貨未贍大錢已竭數歲之間悉爲塵土豈可令取弊之道基於皇代今百姓之貨雖爲轉少而市井之民未有嗟怨此新禁初行品式未一須

史自止不足以垂聖慮唯府藏空匱寔爲重憂今縱行  
細錢官無益賦之理百姓雖贍無解官乏唯簡費去華  
設在節儉求贍之道莫此爲貴然錢有定限而消失無  
方剪鑄雖息終致窮盡者亡應官開取銅之署絕器用  
之塗定其品式日月漸鑄歲久之後不爲世益耳

又鑄二銖錢議

議者將爲官藏空虚宜更改鑄天下銅少宜減錢式以  
救交弊賑國紓民愚以爲不然今鑄二銖恣行新細於

官無解於乏而人姦巧大興天下之貨將靡碎至盡空  
立嚴禁而利深難絕不過一二年間其弊不可復救其  
甚不可一也今鎔鑄有頓得一二億理縱復得此必待  
彌年歲暮稅登財弊暫革日月之費不贍數月雖權徵  
助何解乏耶徒使姦民意騁而貽厥愆謀此又甚不可  
二也民懲大錢之改兼畏近日新禁市井之間必至喧  
擾遠利未開切患猥及富商得志貧民困窘此又甚不  
可三也若使交益深重尚不可行況又未見其利而衆

弊如此失算當時取誚百代乎

讓中書令表

峻自散騎常侍丹陽尹  
加中書令表讓不許

虛竊國靈坐招禁要聞命慙惶形魂震越臣東州凡鄙  
生微於時長自閭閻不窺官轍門無富貴志絕華伍直  
以委身壘畝饑寒交切先朝陶鈞庶品不遺愚賤得免  
耕稅之勤廁仕進之末陛下盛德居蕃總攬英異越以  
不才超塵清軌奉躬歷稔勞効莫書仰恃曲成之仁畢  
願守宰之秩豈期天地中閔殷憂啟聖倚附興運擢景

神塗雲飛海泳冠絕倫等曾未三暮殊命八萃詳科賞  
典則臣不應科瞻言勤良則臣與侔貴方欲訴款皇朝  
降階盛序微已國言少徹身謫而制書猥下爵樹彌隆  
臣小人也不及遠謀寵利之來何能居約徒以上瀆天  
明下汨彝議灾謫之興懼必在邇今之過授以先微身  
苟曰非據危辱將及十手所指諭等膏肓所以寤寐兢  
遽維縈苦疾者也伏願陛下察其丹誠矜其疾願絕會  
收恩以全愚分則造化之施方茲爲薄

張暢卒官表孝武帝

暢領太子右衛率孝建二年出爲會稽太守卒官

張暢遂不救疾東南之秀早樹風範聞問悽慘深切常懷

爲武陵王駿移京邑檄

世祖初以武陵王授南中郎將江州刺史駿爲

諸議參軍及元凶劭弑立舉義入討駿參預密謀兼修文檄時駿父延之爲光祿大夫助以檄示之曰是誰所造曰駿之筆也劭曰言辭何至乃爾曰駿尚不顧老父何能爲陛下由是得免

夫運不常隆代有莫大之釁爰自上葉或因多難以成



福或階昏虐以兆亂咸由君臣義合禮悖恩離故堅冰之邁每鍾澆水未有以道御世教化明厚而當梟獍反噬難發天屬者也先帝聖德在位功格區宇明照萬國道洽無垠風之所被荒隅變識仁之所動木石開心而賊助乘藉冢嫡夙蒙寵樹正位東朝禮絕君后凶慢之情發于髻齒猜忍之心成於幾立賊濬險躁無行自幼而長交相倚附共逞奸回先旨以王室不造家難亟結故含蔽容隱不彰其釁訓誘啟告冀能革音何悟狂慝

不悛同惡相濟肇亂巫蠱終行弑逆聖躬離荼毒之痛  
社稷有剪墜之哀四海悲心人神泣血生民以來未聞  
斯禍奉諱驚號肝腦塗地煩冤膈臆容身無所大將軍  
諸王幽閒窮省存亡未測徐僕射江尚書袁左率皆當  
世標秀一時忠貞或正色立朝或聞逆弗順並橫分階  
闥懸首都市宗黨夷滅豈伊一姓禍毒所流未知其極  
昔周道告難齊晉勤王漢歷中圯虛年立節異姓末屬  
猶或亡軀况幕府職同昔人義兼臣子所以枕戈嘗膽

苟全視息志梟元凶少雪讎恥今命冠軍將軍領咨議  
中直兵柳元景寧朔將軍領中直兵馬文恭等統勁卒  
三萬風馳徑造石頭分趨白下輔國將軍領咨議中直  
兵宗慤等勒甲楯二萬征虜將軍領司馬武昌內史沈  
慶之等領壯勇五萬相尋就路支軍別統或焚舟破釜  
步自姑熟或迅楫蕪湖入據雲陽凡此諸帥皆英果權  
奇智略深瞻名震中土勲暢遐疆幕府親董精悍一十  
餘萬授律枕戈駱驛繼邁司徒叡哲淵謨赫然震發徵

甲八州電起荆郢冠軍將軍臧質忠烈協舉震動漢陰  
冠軍將軍朱修之誠節亮歎悉力請奮荆雍百萬稍次  
近塗蜀漢之卒續已出境又安東將軍誕平西將軍遵  
考前撫軍將軍蕭思話征虜將軍魯爽前寧朔將軍王  
玄謨並密信俱到不契同期傳檄三吳馳軍京邑遠近  
俱發揚旂萬里樓艦騰川則滄江霧咽銳卒赴野則林  
薄摧根謀臣智士雄夫毅卒畜志須時懷憤待用先聖  
靈澤結在民心逆順大數宜發天理無父之國天下無

之羽檄既馳華夷響會以此衆戰誰能抗禦以此義動  
何往不捷况逆醜無親人鬼所背計其同惡不盈一旅  
崇極羣小是與比周哲人君子必加積忌傾海注螢頽  
山壓卵商周之勢曾何足云諸君或奔世貞賢身缺皇  
渥或勲列肺腑休否攸同拘逼凶勢俛眉冠手含憤茹  
感不可爲心大軍近次威聲已接便宜因變立功洗雪  
滓累若事有不獲能背逆歸順亦其次也如有守迷遂  
往黨一凶類刑茲無赦戮及五宗賞罰之科信如日月

原火一燎異物同灰幸求多福無貽後悔書到宣告咸使聞知

顏測

延之子官大司徒錄事參軍文帝嘗問延之諸子才能對曰測得臣文

謝司徒江夏王義恭賜絹葛啓

氷紉風締事膺盛服

太平御覽

梔子贊

濯雨時摘素當颺獨含芬豐榮殊未紀銷落竟誰聞

庾徵之

劾顏竣奏

竣初爲世祖撫軍主簿至是藉蕃朝之舊極言竣諫無所回避又自謂才

足幹時當贊務居中而所陳多不被納乃求外出大明元年出爲東揚州刺史頗懷怨憤又言朝士違謬人主得失上乃使御史中丞庾徽之奏免官竣頻啟謝罪并乞性命上愈怒下詔及竟陵王誕爲逆因此陷之上復召徽之爲奏詔賜死

臣聞人臣之奉主毀家光國竭情無私若乃無禮陵人  
怙富卑上是以王叔作戒子哲爲戮未有背本塞原好  
利忘義而得自容盛世溷亂清流者也右將軍東揚州  
刺史建城縣開國侯顏竣因附風雲謬蒙翼長天地更

造拔以非次聖朝親攬萬務一歸而窺覘國柄潛圖秉  
執受任選曹驅扇滋甚出尹京輦形勢彌放傳詔犯憲  
舊須啓聞而竣以通訴忤已輒加鞭辱因顧威靈莫此  
爲甚嚴詔屢發當官責效竣權恣不行怨懟彌起懷挾  
姦數苞藏陰慝預聞中旨因不宣露罰則委上恩必歸  
已荷遇之門即加謗辱受譴之室曲相哀撫翻戾朝紀  
狡惑視聽脅懼上宰激動閭閻未上慮聞內懷猜懼僞  
請東牧以卜天旨既獲出蕃怨詈方肆反脣腹誹方之



已輕且時有啓奏必恊姦私宣示親朋動作羣小前冬  
母亡詔賜還葬事畢不去盤桓經時方構間勲貴造立  
同異又表示危懼深營身觀曲訪大臣慮不全立遂以  
已被斥外國道將顛釁積懷抱惡窮辭色兼行闕于家  
早負世議逮身居崇寵奉兼萬金榮以夸親祿不充養  
宿憾母弟恃貴輒戮天倫怨毒親交震駭凡所莅任皆  
闕政刑輒開丹陽庫物貸借吏下多解資禮解爲門生  
充朝滿野殆將千計驕放自下妨公害私取監解見錢

以供帳下賓旅酣歌不異平月街談道說非復風聲竣  
代都文吏特荷天私棄瑕錄用豫參要重勞無汗馬賞  
班河山出內寵靈踰越倫伍山川之性日月彌滋溪壑  
之心在盈彌侈虎冠狼貪未足爲譬今皇明開耀品物  
咸亨傷俗點化實惟害焉宜加顯戮以彰盛化請以見  
事免竣所居官下太常削爵土須事御收付廷尉法獄

臯

乘南史作  
久恩作善

孝武帝詔答

憲司所奏非宿昔所以相期卿受榮遇故當極此訕訕  
怨憤已孤本望乃復過煩思慮懼不自全豈爲下事上  
誠節之至耶

又詔

竣孤負恩養乃可至此於獄賜死妻息宥之以遠

周朗

字義利汝南安成人歷廬陵內史忤旨大明時坐居喪無禮傳送寧州於道殺之

報羊希書

朗少愛奇雅有風氣初爲南平王鑠冠軍行  
參軍太子舍人司徒主簿坐請急不待對除

名又爲江夏王義恭太尉參軍朝議遣義恭  
出鎮彭城爲北討大統朗開解職希爲府主  
簿從義康行與朗書勸令獻奇進  
策朗報之朗之辭意倜儻類如此

羊生足下豈當適使人進哉何卿才之更茂也宅生結  
意可復佳耳屬華比采何更工耶視已反覆慰亦無已  
觀諸紙上方審卿復逢知已動以何術而能每降恩明  
豈不爲足下欣耶然更憂不知卿死所處耳夫匈奴之  
不誅有日皇居之亡辱舊矣天下孰不憤心悲腸以忿  
邊人之患靡衣媮食以望國家之師自智士鉗口雄人

蓄氣不得議圖邊之事者良淹歲紀今天子以炎軒之德豕輔以姬呂之賢故赫然發怒將以匈奴鸞旗惻然動仁欲使餘氓被惠及取士之令朝發宰士暮登英豪調兵之詔夕行主公旦升雄俊延賢人者固非一日況復加此焉夫天下之士砥行磨名欲不辱其志氣選奇蓄異將進善於所天非但有建國之謀不及安民之論不與至反以孝潔生議於鄉曲忠烈起謫於君寀身不絀王臣之錄名不廁通人之班顛倒國門湮銷丘里者

自數十年以往豈一人哉若吾身無他技而出值明君  
變官望主歲增恩價竟不能柔心飾帶取重左右校於  
向士則榮已多料于今識則笑亦廣而足下方復廣吾  
以馳志之時求予以安邊之術何足下不知言也若以  
賢未登則今之登賢如此以才應進則吾之非才若是  
豈可欲以殞海之髻望鼓鰓於豎鱗之肆墜風之羽覲  
振翮於軒毳之間其不能俱陪淥水並負青天可無待  
於明見若乃闕奇謀深智之術無悅主狎俗之能亦不

可復稍爲卿說但觀以上國再毀之臣望府一逐之吏  
當復是天下才否此皆足下所親知吾雖疲冗亦嘗聽  
君子之餘論豈敢忘之凡士之置身有三耳一則雲戶  
岫寢藥危桂榮秣芝浮霜翦松沉雪憐肌蓄髓寶氣愛  
魂非但土石侯卿腐鳩梁錦實乃竚意天后睨目羽人  
次則剗心掃智剖命驅生橫議於雲臺之下切辭於宣  
室之上衍主德而批民患進貞白而酖姦猜委玉入而  
齊聲禮揭金出而烹勅寇使車軌一風甸道共德令功

日濟而已無跡道日富而君難名致諸侯歛手天子改  
觀其末則饜飴而出望旃而入結冕兩宮之下鼓袖六  
王之間俛眉脅肩言天下之道德瞋目扼腕陳縱橫于  
四海理有泰則止而進調覺迂則反而還閒居違官交  
造頓罷捐慕遺憂夷毀銷譽呼噏以補其氣繕嚼以輔  
其生凡此三者皆志士仁人之所行非吾之所能也若  
吾幸病不及死役不至身蓬藜既滿方杜長者之轍轂  
稼是謔自絕世豪之顧塵生牀惟苔積階月又擔中山



木時華月深池上海草歲榮日蔓且室閒軒左幸有陳  
書十篋席隅奧右頗得宿酒數壺按絃拭徽讎方校石  
時復陳局露初奠爵星晚驪然不覺是羲軒後也近春  
田三頃秋園五畦若此無災山裝可具候振飲之罷俟  
封勒之畢當敬觀邠鄴肅尋伊鄩傍眺燕隴邪履遼衛  
覲我周之軫迹弔它賢之憂天當其少涉未休此欲但  
理實詭固物好交加或徵勢而笑其言或觀謀而害其  
意夫楊朱以此猶見嗤於梁人况才減楊子之器物甚

魏君之意者哉若如漢宗之言李廣此固許天下之才又知天下之時非也豈若黨巷閭里之間忌見貞士之遭遇便謂是臧獲庸人之徒耳士固願呈心於其主露竒於所歸卿相末事也若廣者何用侯爲至乃復有致謁於爲亂之日被訕於害正之徒心竒而無由露事直而變爲枉豈不痛哉豈不痛哉若足下可謂冠負日月籍踐淵海心支身首無不通照今復出入燕河交關姬衛整芴振豪已議於帷筵之上提鞭鳴劒復呵於軍

場之間身超每深恩之所集心動必明主之所亮可不  
直議正身輔人君之過誤明目張膽謀軍家之得失操  
志勇之將薦俊正之士此乃足下之所以報也不爾便  
擐甲修戈徘徊左右衛君王之身當馬首之鏑關必固  
之壘交死進之戰使身分而主豫寇滅而兵全此亦報  
之次也如是則繫囚奴於北闕無日矣亡但默默窺寵  
而坐謂子有心敢書薄意

宋書

謹言書

朗世祖初除建平王宏中軍錄事參軍  
時普責百官謹言朗上書忤旨解職

昔仲尼有言治天下若賓諸掌豈徒言哉方策之政息  
舉在人蓋當世之君不爲之耳況乃運鍾澆暮世膺亂  
餘重以宗廟遭不更之酷江服被未有之痛千里連死  
萬井共泣而秦漢餘敝尚行於代魏晉遺謬猶布於民  
是而望國安於今化崇於古卻行及前之言積薪待燃  
之譬言臣不知所以方然陛下既基之以孝又申之以仁  
民所疾苦敢不略薦凡治者何哉爲教而已今教衰已  
久民不知則又隨以刑逐之豈爲政之道歟欲爲教者

宜二十五家選一長百家置一師男子十三至十七皆  
令學經十八至二十盡使修武訓以書記圖律忠孝仁  
義之禮廉讓勤恭之則授以兵經戰略軍部舟騎之容  
挽彊擊刺之法官長皆月至學所以課其能習經者五  
年有立則言之司徒用武者三年善藝亦升之司馬若  
七年而經不明五年而勇不達則更求其言政置謀迹  
其心術行履復不足取者雖公卿子孫長歸農畝終身  
不得爲吏其國學則宜詳考古數部定子史令書不煩

行習無廢力凡學雖山荒不宜廢也農桑者寔民之命  
爲國之本有一不足則禮節不興若重之宜罷金錢以  
穀帛爲賞罰然愚民不達其權議者好增其異凡自淮  
以北萬匹爲市從江以南千斛爲貨亦不患其難也今  
且聽市至千錢以還者用錢餘皆用絹布及米其不中  
度者坐之如此則墾田自廣民資必繁盜鑄者罷人死  
必息又田非膠水皆播麥菽地堪滋養悉藝紵麻蔭荈  
緣藩必樹桑柘列庭接宇唯植竹粟若此令既行而善

其事者庶民則敘之以爵有司亦從而加賞若田在草間木物不植則撻之而伐其餘樹在所以次坐之又取稅之法宜計人爲輸不應以貲云何使富者不盡貧者不蠲乃今桑長一尺圍以爲價田進一畝度以爲錢屋不得瓦皆責貲寔民以此樹不敢種土畏妄墾棟焚椽露不敢加泥豈有剥善害民禁衣惡食若此苦者方今若重斯農則宜務削茲法凡爲國不患威之不立患恩之不下不患土之不廣患民之不育自華夷爭殺戎夏

競威破國則積屍竟邑屠將則覆軍滿野海內遺生蓋  
不餘半重以急政嚴刑天災歲疫貧者但供吏死者不  
望葬鰥居有不願要生子每不敢舉又成淹徭久妻老  
嗣絕及姪奔所孕皆復不收是殺人之日有數途生人  
之歲無一理不知復百年間將盡以草木爲世耶此最  
是驚心悲魂慟哭太息者法雖有禁殺子之科設蚤娶  
之令然觸刑罪忍悼痛而爲之豈不有酷甚處耶今宜  
家寬其役戶減其稅女子十五不嫁家人坐之特雉可



以娉妻妾大布可以事舅姑若徒足而行則有司加糾  
凡宮中女隸必擇不復字者庶家內役皆令各有所配  
要使天下不得有終獨之生無子之老所謂十年存育  
十年教訓如此則二十年間長戶勝兵必數倍矣又亡  
者亂郊饑人盈旬皆是不爲其存計而任之遷流故饑  
寒一至慈母不得保其子欲其不爲寇盜豈可得耶既  
御之使然復止之以殺彼於有司何酷至是且草樹既  
死皮葉皆枯是其梁肉盡矣冰霜已厚苫蓋難資是其

衣裘敗矣比至陽春生其餘幾今自江以南在所皆穰  
有食之處須官興役宜募遠近能食五十口一年者賞  
爵一級不過千家故近食十萬口矣使其受食者悉令  
就佃淮南多其長帥給其糧種凡公私遊手歲發佐農  
令堤湖盡修原陸並起仍量家立社計地設閭檢其出  
入督其遊惰須待大熟可移之復舊淮以北悉使南過  
江東旅客盡令西歸故毒之在體必割其緩處函渭靈  
區閭爲荒窟伊洛神基蔚成茂草豈可不懷歟歷下泗

間何足獨聽議者咸以爲魏衰不足避而不知我之病甚於魏矣若謂民之既徙狄必就之若其來從我之願也魏若能來必非其種不過山東雜漢則是國家由來所欲覆育既華得坐實戎空自遠其爲來利固善也今空守孤城徒費財役亦行見淮北必非境服有矣不亦重辱喪哉使魏但發輕騎三千更互出入春來犯麥秋至侵禾水陸漕輸居然復絕於賊不勞而邊已困不至二年卒散民盡可躋足而待也設使魏滅則中州必有

興者決不能有奉土地率民人以歸國家矣誠如此則徐齊終逼亦不可守且夫戰守之法當恃人之不敢攻頃年兵之所以敗皆反此也今人知不以羊追狼蟹捕鼠而令重車弱卒與肥馬悍敵相逐其不能濟固宜矣漢之中年能事夷者以馬多也夷之後服漢者亦以馬少也既兵不可去車騎應蓄今宜募天下使養馬一匹者蠲一人役三匹者除一人爲吏自此以進階賞有差邊亭徼驛一無發動又將者將求其死也自能執干戈

幸而不亡筋力盡於戎役其於望上者固已深矣重有  
澄風掃霧之勲驅波滌塵之力此所自矜尤復爲甚近  
所功賞人知其濃然似頗謬虛實怨怒實衆垂臂而反  
唇者往往爲部耦語而呼望者處處成羣凡武人意氣  
特易崩沮設一旦有變則向之怨者爲敵也今宜國財  
與之共竭府粟與之同罄去者應遣濃加寵爵發所在  
祿之將秩未充餘費宜闕他事負輦長不應與唯可教  
以蒐狩之禮習以蒐狩之節若假勇以進務黜其身老

至而罷賞延於嗣又緣淮城壘皆宜興復使烽鼓相達  
兵食相連若邊城請帥皆宜莫許遠夷貢至止於報荅  
語以國家之未暇示以何事而非君須內教既立徐料  
寇形辦騎卒四十萬而國中不擾取穀支二十歲而遠  
邑不驚然後越淮窮河跨隴出漠亦何適而不可又教  
之不敦一至於令士大夫以下父母在而兄弟異計  
十家而七矣庶人父子殊產亦八家而五矣凡甚者乃  
危亡不相知饑寒不相卹又嫉謗讒害其間不可稱數

宜明其禁以革其風先有善於家者即務其實自今不改則沒其財又三年之喪天下之達喪以其哀並中出故制同外興日久均痛故愈遲齊典漢氏節其臣則可矣薄其子則亂矣云何使哀直之容盡鳴號之音息夫佩玉啟旒深情弗忍晁珠視朝不亦甚乎凡法有變於古而刻於情則莫能順焉至乎敗於禮而安於身必遽而奉之何乃厚于惡薄于善歟今陛下以大孝始基宜反斯謬且朝享臨御道近自身始妃主典制宜漸加矯

正凡舉天下以奉一君何患不給或帝有集阜之陋后有帛布之鄙亦無取焉且一體炫金不及伯兩一歲美衣不過數襲而必收寶連櫝集服累笥目豈常視身未時親是爲櫝帶寶笥着衣空散國家之財徒奔天下之貨而主以此情禮妃以此傲家是何糜蠹之劇惑鄙之甚逮至婢豎皆無定科一婢之身重婢以使一豎之家列豎以役瓦金皮繡漿酒藿肉者故不可稱紀至有列輶以遨遊飾兵以驅叱不亦重甚哉若禁行賜薄不容



致此且細作始并以爲節儉而市造華怪即傳于民如  
此則遷也非罷也凡天下得治者以實而治天下者常  
虛民之耳目既不可誑治之盈耗立亦隨之故凡厥庶  
民制度日侈商販之室飾等王侯傭賣之身製均妃后  
凡一袖之大足斷爲兩一裾之長可分爲二見車馬不  
辨貴賤視冠服不知尊卑尚方今造一物小民明已睥  
睨宮中朝制一衣庶家晚已裁學侈麗之原實先宮闈  
又妃主所賜不限高卑自今以去宜爲節目金魄翠玉

錦繡縠羅奇色異章小民既不得服在上亦不得賜若  
工人復造奇伎淫器則皆焚之而重其罪又置官者將  
以燹天平氣贊地成功防姦御難治煩理劇使官稱事  
立人稱官置無空樹散位繁進冗人今高卑賈實大小  
反稱名之不定是謂官邪而世廢姬公之制俗傳秦人  
之法惡明君之典好闇主之事其憎聖愛愚何其甚矣  
今則宜先省事從而并官置位以周典爲式燹名以適  
時爲用秦漢末制何足取也當使德厚者位尊位尊者

祿重能薄者官賤官賤者秩輕纓冕紱佩稱官以服車  
騎容衛當職以施又寄土州郡宜通廢置舊地民戶應  
更置立豈吳邦而有徐邑揚境而宅充民上洊辰紀下  
亂畿甸其地如朱方者不宜置州土如江都者應更建  
邑又民少者易理君近者易歸凡吏皆宜每詳其能每  
厚其秩爲縣不得復用恩家之貧爲郡不得復選世族  
之老又王侯識未堪務不應彊仕須合冠而啟封能政  
而議爵且帝子未官人誰謂賤但宜詳置賓友選擇正

人亦何必列長史參軍別駕從事然後爲貴哉又世有先後業有難易明帝能令其兒不匹光武之子馬貴人能使其家不比陰后之族盛矣哉此其後世不可忘也至當興抑碎首之忿陞殿延辟戰之威此亦復不可忘也内外之政實不可雜若妃主爲人請官者其人宜終身不得爲官若請罪者亦終身不得赦罪凡天下所須者才而才誠難知也有深居而言寡則蘊學而無由知有卑處而事隔則懷奇而無由進或復見忌于親故或

亦遭讒于貴黨其欲致車右而動御席語天下而辯治  
亂焉可得哉漫言舉賢則斯人固未得矣宜使世之所  
稱通經達史辨詞精數吏能將謀徧術小道者使獵纓  
危郝博求其用制內外與官之官遠近及仕之類令各  
以所能而造其室降情以誘之卑身以安之然後察其  
擢唇吻樹頰胥動精神發意氣語之所至意之所執不  
過數四間不亦盡可知哉若忠孝廉清之比彊正惇柔  
之倫難以檢格立不可須臾定宜使鄉部求其行守宰

察其能竟皆見之於選貴呈之於相主然後處其職宜  
定其位用如此故應愚鄙盡捐賢明悉舉矣又俗好以  
毀沉人不知察其所以致毀以譽進人不知測其所以  
致譽毀徒皆鄙則宜擢其毀者譽黨悉庸則宜退其譽  
者如此則毀譽不妄善惡分矣又既謂之才則不宜以  
階級限不應宜以年齒齊凡貴者好疑人少不知其少  
於人矣老者亦輕人少不知其不及少矣自釋氏流教  
其來有源淵檢精測固非深矣舒引容潤既亦廣矣然

習慧者日替其修求誠者月繁其過遂至糜散錦帛侈飾車從復假粗醫術託雜卜數延姝滿室置酒浹堂寄夫託妻者不無殺子乞兒者繼有而猶倚靈假像背親傲君欺費疾老震損宮邑是乃外刑之所不容戮內教之所不悔罪而橫天地之事莫不糾察人不得然豈其鬼歟今宜申嚴佛律裨重國令其疵惡顯著者悉皆能遣除則隨其執行各爲之條使禪義經誦人能其一食不過蔬衣不出布若應更度者則令先習義行本其神

心必能草腐人天竦精以往者雖王侯家子亦不宜拘  
凡鬼道惑衆妖巫破俗觸木而言怪者不可數寓采而  
稱神者非可算其原本是亂男女合飲食因之而以祈  
祝從之而以報請是亂不誅爲害未息凡一苑始立一  
神初興淫風輒以之而甚今脩堤以北置園百里峻山  
以右居靈十房糜財敗俗其可稱限又針藥之術世寡  
復脩診脉之技人鮮能達民因是益徵于鬼遂棄于醫  
重令耗惑不反死天復半今太醫宜男女習教在所因



遣吏受業如此故當愈於媚神之愚徵正湊理之敝矣  
凡無世不有言事未時不有令下然而升平不至昏危  
是繼何哉蓋設令之本不實也又病言不出於謀臣事  
不便於貴黨輕者抵訾呵駭重者死壓窮擯故西京有  
方調之誅東郡有黨錮之戮陛下若欲申常令循末典  
則羣臣在焉若欲改舊章興王道則微臣存矣敢昧死  
以陳唯陛下察之

沈懷文

字思明吳興武康人歷晉安王征  
虜長史廣陵太守直言忤旨賜死

省錄尚書議

懷文轉揚州治中從事史時議  
省錄尚書以爲非宜上議不從

昔天官正紀六典序職載師掌均七府成務所以翼平  
辰衡經贊邦極故總屬之原著夫官典和統之要昭于  
國言夏因虞禮有深家司之則周承殷法無損掌邦之  
儀用乃調佐王均緝亮帝度而式憲之軌弘正漢庭述  
章之範崇明魏室雖條錄之名立稱於中代總釐之實  
不愆于自古比代相沿歷朝罔貳及乎爵以事變級以  
時改皆興替之道無害國章八統元任靡或有革按台

輔之職三曰禮典以和邦國以統百官四曰政典以平邦國以正百官鄭康成云冢宰之於庶僚無所不總也考于茲義備於典文詳古準今不宜虛廢

減省皇子邸舍奏

諸皇子皆置邸舍逐什一之利爲患偏天下懷文言之不

聽

列肆販賣古人所非故卜式明不雨之由弘羊受致旱之責若以用度不充頓止爲難者故宜量加減省

侍中趙倫之碑

太平御覽

君戮力以致誠吐規以會機一鼓則冠騎雲徹旌動則敵氣霧消

沈懷遠

吳興人爲始興王濬府佐

長鳴鷄贊

初學記

翠冠繡莒碧距麗陳就昏別夕望旭驚晨

孫豁

減米課表

元嘉中始興太守孫豁上表詔善之

武吏年滿十六使課米六十斛十五以下至十三皆課

三十斛一戶內隨丁多少悉皆輸米且十三歲兒未堪  
田作或是單迴便是逃匿戶口歲減實此之由宜更量  
課限使得存立今若減其米課雖有交損考之將來理  
有深益

杜氏  
通典

祖冲之

字文遠范陽蘄人解褐南徐州從事公府參軍入齊歷長水校尉

上新厯表

孝武帝大明六年南徐州從事史祖冲之表上厯法八年太子旅賁郎中

將戴法興議駁冲之復  
隨法興所難辨析之

古厯疎舛頗不精密羣氏糾紛莫審其要何承天所奏

意存改革而置法簡略今已乖遠以臣校之三觀厥謬  
日月所在差覺三度二至晷影幾失一日五星見伏至  
差四旬留逆進退或移兩宿分至乖失則節閏非正宿  
度違天則伺察無准臣生屬聖辰逮在昌運敢率愚瞽  
更勅新厯謹依改易之意有二設法之情有三改者其  
一以舊法一章十九歲有七閏閏數爲多經二百年輒  
差一日節閏既移則應改法厯紀屢遷實由此條今改  
章法三百九十一年有一百四十四閏令卻合周漢則

將來永用無復差動其二以堯典云日短星昴以正仲冬以此推之唐代冬至日在今宿之左五十許度漢代之初即用秦厯冬至日在牽牛六度漢武改立太初厯冬至日在牛初後漢四分法冬至日在斗二十二晉時姜岌以月蝕檢日知冬至在斗十七今參以中星課以蝕望冬至之日在斗十一通而計之未盈百載所差二度舊法並令冬至日有定處天數既差則七曜宿度漸與厯舛乖謬既著輒應改制僅合一時莫能通遠遷革不

已又由此條今令冬至所在歲歲微差卻檢漢注並皆  
審密將來久用無煩屢改又設法者其一以子爲辰首  
位在正北文應初九斗氣之端虛爲北方列宿之中元  
氣肇初宜在此次前儒虞喜備論其義今歷上元日度  
發自虛一其二以日辰之號甲子爲先歷法設元應在  
此歲而黃帝以來世代所用凡十一歷上元之歲莫值  
此名今歷上元歲在甲子其三以上元之歲歷中衆條  
並應以此爲始而景初歷交會遲疾亦置紀差裁合朔



氣而已條序紛互不及古意今設法日月五緯交會遲疾悉以上元歲首爲始則合璧之曜信而有徵連珠之暉於是乎在羣流共源寔精古法若夫測以定形據以實效縣象著明尺表之驗可推動氣幽微寸管之候不忒今臣所立易以取信但深練始終大存整密革新變舊有約有繁用約之條理不自懼用繁之意顧非謬然何者夫紀閏參差數各有分分之爲體非細不容臣是用深惜毫釐以全求妙之準不辭積累以成永定之制

非爲思而莫悟知而不改也竊恐讚有然否每崇遠而  
隨近論有是非或貴耳而遺目所以竭其管穴俯洗同  
異之嫌披心日月仰希葵藿之照若臣所上萬一可采  
伏願頒宣羣司賜垂詳究庶陳錙銖少增盛典

戴法興

會稽山陰人孝武帝南中郎典籤從義封吳昌縣男越騎校尉前廢帝時賜死

難祖冲之歷法議

上元之歲歲在甲子天正中子朔夜半冬至日月五星聚

于虛度之初陰陽遲疾並自此始世祖使內  
外博議時人少解歷數竟無異同唯太子旅  
賁中郎將戴法興議冲之復隨難辨折時法  
興爲世祖所寵論者皆附之唯中書舍人巢

尚之是冲之術上欲須明年改  
元因改用冲之歷而官車晏駕

三精數微五緯會始自非深推測窮識畧變豈能刊古  
革今轉正圭宿案冲之所議每有違舛竊以愚見隨事  
辨問案冲之新推歷術今冬至所在歲歲微差臣法興  
議夫二至發歛南北之極日有恒度而宿無改位古歷  
冬至皆在建星戰國橫驚史官喪紀爰及漢初格候莫  
審後雜覘知在南斗二十二度元和所用即與古歷相  
符也逮至景初而終無毫忒書云日短星昴以正仲冬

直以月維四仲則中宿常在衛陽羲和所以正時取其萬世不易也冲之以爲唐代冬至日在今宿之左五十許度遂虛加度分空撤天路其置法所在近違半次則四十五年九月率移一度在詩七月流火此夏正建申之時也定之方中又小雪之節也若冬至審差則豳風火流晷長一尺五寸楚宮之作晝漏五十三刻此詭之甚也仲尼曰丘聞之火伏而後蟄者畢今火猶西流司歷過也就如冲之所誤則星無定次卦有差方名號之

正古今必殊典誥之音代不通軌堯之開閉今成建除  
今之壽星乃周之鵜尾即時東壁已非玄武軫星頓屬  
蒼龍誣天背經乃至於此冲之又改章法三百九十一  
年有一百四十四閏臣法興議夫日有緩急故斗有闕  
狹古人制章立爲中格年積十九常有七閏畧或虛盈  
此不可革冲之削閏壞章倍減餘數則一百三十九年  
二月於四分之料頓少一日七千四百二十九年輒失  
一閏夫日少則先時閏失則事悖竊聞時以作事事以

厚生以此乃生人之大本歷數之所先愚恐非冲之淺慮妄可穿鑿冲之又命上元日度發自虛一云虛爲北方七宿之中臣法興議冲之既云冬至歲差又謂虛爲北中舍形貴影未足爲迷何者凡在天非日不明居地以斗而辯借令冬至在虛則黃道彌遠東北當爲黃鍾之宮室壁應屬玄枵之位虛宿豈得復爲北中乎曲使分至屢遷而星次不改招搖易繩而律呂仍往則七政不以璣衡致齊建時亦非攝提所紀不知五行何居六

屬安託冲之又今上元年在甲子臣法興議夫置元設  
紀各有所尚或據文於圖讖或取效於當時冲之云羣  
氏糾紛莫審其會昔黃帝辛卯日月不過顓頊乙卯四  
時不忒景初壬辰晦無差光元嘉庚辰朔無錯景豈非  
承天者乎冲之苟存甲子可謂爲合以求天也冲之又  
令日月五緯交會之元遲疾悉以上元爲始臣法興議  
夫交會之元則食既可求遲疾之際非凡夫所測昔賈  
逵畧見其差劉洪脩著其術至于疎密之數莫究其極

且五緯所居有時盈縮即如歲星在軫見超七晨術家  
既追算以會今則往之與來斷可知矣景初所以紀首  
置差元嘉兼又各設後元者其並省功于實用不虛推  
以爲煩也冲之既違天於改易又設法以遂情愚謂此  
治歷之大過也臣法興議日有八行各成一道月有一  
道離爲九行左交右疾倍半相違其一終之理日數宜  
同冲之通同與會周相覺九千四十其陰陽七十九周  
有奇遲疾不及二匝此則當縮反盈應損更益



祖冲之辨戴法興厯難議

臣少銳愚尚專功數術搜練古今博采沉與唐篇夏典  
莫不揆量周正漢朔咸加該驗罄策籌之思究疏密之  
辨至若立員舊誤張衡述而弗改漢時解銘劉歆詭謬  
其數此則算氏之劇疵也乾象之弦望定數景初之交  
度周日匪謂測候不精遂乃乘除翻謬斯又厯家之甚  
失也及鄭玄闡澤王蕃劉徽並綜數藝而每多疏舛臣  
昔以暇日撰正衆謬理據炳然易可詳密此臣以俯信

偏識不虛推古人者也按何承天歷二至先天閏移一月五星見伏或違四旬列差妄設當益反損皆前術之乖遠臣歷所改定也既沿波以討其源刪滯以暢其要能使躔次上通晷管下合反以譏詆不其惜乎尋法興所議六條並不造理難之關楫謹陳其目其一日度歲差前法所略臣據經史辨正此數而法興設難微引詩書三事皆謬其二臣校晷景改舊章法法興立難不能有詰直云恐非淺慮所可穿鑿其三次改方移臣無此

法求術意誤橫生嫌貶其四歷上元年甲子述體明整  
則苟合可疑其五臣具歷七曜咸始上元無隙可乘復  
云非凡所測其六遲疾陰陽法興所未解誤謂兩率日  
數宜同凡此衆條或緣謬目譏或空加抑絕未聞折正  
之談厭心之論也謹隨詰洗釋依源徵對仰照天暉敢  
罄管穴法興議曰夫二至發斂南北之極日有恒度而  
宿無改位故古歷冬至皆在建星冲之曰周漢之際疇  
人喪業曲技競設圖諱實繁或借號帝王以崇其大或

假名聖賢以神其說是以讖記多虛桓譚知其矯妄古  
厯舛雜杜預疑其非真按五紀論黃帝厯有四法顓頊  
夏周並有二術詭異紛然則孰識其正此古厯可疑之  
據一也夏厯七曜西行特違衆法劉向以爲後人所造  
此可疑之據二也殷厯日法九百四十而乾鑿度云殷  
厯以八十一爲日法若易緯非差殷厯必妄此可疑之  
據三也顓頊厯元歲在乙卯而命厯序云此術設元歲  
在甲寅此可疑之據四也春秋書食有日朔者凡二十

六其所據厯非周則魯以周厯考之檢其朔日失二十  
五魯厯校之又失十三二厯並乖則必有一僞此可疑  
之據五也古之六術並同四分四分之法久則後天以  
食檢之經三百年輒差一日古厯課今其甚踈者朔後  
天過二日有餘以此推之古術之作皆在漢初周末理  
不得遠且却校春秋朔並先天此則非三代以前之明  
徵矣此可疑之據六也尋律厯志前漢冬至日在斗牛  
之際度在建星其勢相隣自非帝者有造則儀漏或闕

豈能窮密盡微纖毫不失建星之說未足證兵法興議  
曰戰國橫騫史官喪紀爰及漢初格候莫審後雜覘知  
在南斗二十二度元和所用即與古厯相符也逮至景  
初終無毫忒冲之曰古術訛雜其詳闕聞乙卯之厯秦  
代所用必有效于當時故其言可徵也漢武改創檢課  
詳備正儀審漏事在前史測星辨度理無乖遠今議者  
所是不實見所非徒爲虛妄辨彼駭此既非通談運今  
背古所誣誠多偏據一說未若兼今之爲長也景初之

法實錯五緯今則在衝口至曩已移日蓋略治朔望無  
事檢候是以晷漏昏明並即元和二分異景尚不知革  
日度微差宜其謬矣法興議曰書云日短星昴以正仲  
冬直以月推四仲則中宿常在衛陽義和所以正時取  
其萬代不易也冲之以爲唐代冬至日在今宿之左五  
十許度遂虛加度分空撤天路冲之曰書以四星昏中  
審分至者據人君南面而言也且南北之正其詳易准  
流見之勢中天爲極先儒注述其義僉同而法興以爲

書說四星皆在衛陽之位自在巳地進失向方退非始見迂迴經文以就所執違訓詭情此則甚矣捨午稱巳午上非無星也必據中宿餘宿豈復不足以正時若謂舉中語兼七列者背參尚隱則不得言昴星雖見當云伏矣奎婁已見復不得言伏見

缺

不得以爲辭則名

將何附若中宿之通非允當寔謹檢經旨直云星昴不自衛陽衛陽無自顯之義此談何因而立苟理無所依則愚辭成說曾泉桑野皆爲明證分至之辯竟在何日循



復再三竊深歎息法興議曰其置法所在近違半次則四十五年九月率移一度冲之曰元和日度法興所是唯徵古厯在建星以今考之臣法冬至亦在此宿斗二十了無顯證而虛貶臣厯垂差半次此愚情之所駭也又年數之餘有十一月而議云九月涉數每乖皆此類也月盈則食必在日衝以檢日則宿度可辨請據效以課疏密按太史註記元嘉十三年十二月十六日中夜月蝕盡在鬼四度以衝計之日當在牛六依法興議

曰在女七又十四年五月十五日丁夜月蝕盡在斗二十六度以衝計之日當在井三十依法興議曰日在柳二又二十八年八月十五日丁夜月蝕在奎十一度以衝計之日當在角二依法興議曰日在角十二又大明三年九月十五日乙夜月蝕盡在胃宿之末以衝計之日當在氐十二依法興議曰日在心二凡此四蝕皆與臣法符同纖毫不爽而法興所據頗差十度違衝移宿顯然易覩故知天數漸差則當式遵以爲典事驗昭哲

豈得信古而疑今法興議曰在詩七月流火此夏正建  
申之時也定之方中又小雪之節也若冬至審差則豳  
風火流晷長一尺五寸楚宮之作晝漏五十三刻此詭  
之甚也冲之曰臣按此議三條皆謬詩稱流火蓋略舉  
西移之中以爲驚寒之候流之爲言非始動之辭也就  
如始說冬至日度在斗二十二則火星之中當在大暑  
之前豈隣建申之限此專自攻糾非謂矯失夏小正五  
月昏大火中此復在衛陽之地乎又謂臣所立法楚宮

之作在九月初按詩傳箋皆謂定之方中者室壁昏中  
形四方也然則中天之正當在室之八度臣厯推之元  
年立冬後四日此度昏中乃自十月之初又非寒露之  
日也議者之意蓋誤以周世爲堯時度差五十故致此  
謬小雪之節自信之談非有明文可據也法興議曰仲  
尼曰丘聞之火伏而後蟄者畢今火猶西流司厯過也  
就如冲之所誤則星無定次卦有差方名號之正古今  
必殊典誥之音時不通軌堯之開閉今成建除今之壽

星乃周之鶉尾也即時東壁已非玄武軫星頓屬蒼龍  
誣天背經乃至於此冲之曰臣以爲辰極居中而列曜  
貞觀羣像殊體而陰陽區別故羽介咸陳則水火有位  
蒼素齊設則東西可準非以日之所在定其名號也何  
以明之夫陽爻初九氣始正北玄武七列虛當子位若  
圓儀辨方以日爲主冬至所舍當在玄武而今之南極  
乃處東維違體失中其義何附若南北以冬夏稟稱則  
卯酉以生殺定號豈得春躔義方秋麗仁域名舛理乖

若此之反哉因茲以言固知天以列宿分方而不在於  
四時景緯環序日不獨守故轍矣至于中星見伏記籍  
每以審時者蓋以歷數難詳而天驗易顯各據一代所  
合以爲簡易之政也亦猶夏禮未通商典濩容豈襲韶  
節誠天人之道同差則藝之興因代而推移矣月位稱  
建諒以氣之所本名隨實著非謂斗杓所指近校漢時  
已差半次審斗節時其效安在或義非經訓依以成說  
將緯候多詭偏辭間設乎次隨方名義合宿體分至雖

遷而厥位不改豈謂龍火貿處金水亂列名號乖殊之  
譏抑未詳究至如璧非玄武軫屬蒼龍瞻度察晷實效  
咸然元嘉厯法壽星之初亦在翼限參校晉注顯驗甚  
衆天數差移百有餘載議者誠能馳辭騁辯令南極非  
冬至望不在衝則此談乃可守耳若使日遷次留則無  
事屢嫌乃臣厯之良證非難者所宜列也尋臣所執必  
據經史遠考唐典近徵漢籍識記碎言不敢依述竊謂  
循經之論也月蝕檢日度事驗昭著史注詳論又存禁

閏斯又稽天之說也堯典四星並存衛陽今之日度遠  
準元和誣背之誚實此之謂法興議曰夫日有緩急故  
斗有闊狹古人制章立爲中格年積十九常有七閏畧  
或盈虛此不可革冲之削閏壞章倍減餘數則一百三  
十九年二月於四分之料頓少一日七千四百二十九  
年輒失一閏夫日少則先時閏失則事悖竊聞時以作  
事事以厚生此乃生民之所本厯數之所先愚恐非冲  
之淺慮安可穿鑿冲之曰按後漢書及乾象說四分厯



法雖分章設部卽自元和而晷儀衆數定于嘉平三年  
四分志立冬中影長一丈立春中影九尺六寸尋冬至  
南極日晷最長二氣去至日數既同則中影應等而前  
長後短頓差四寸此厯景冬至後天之驗也二氣中影  
日差九分半弱進退均調略無盈縮以率計之二氣各  
退二日十二刻則晷景之數立冬更短立春更長並差  
二寸二氣中影俱長九尺八寸矣卽立冬立春之正日  
也以此推之厯置冬至後天亦二日十二刻也嘉平三

年時厯丁丑冬至加時正在日中以二日十二刻減之  
天定以乙亥冬至加時在夜半後三十八刻又臣測景  
歷紀躬辨分寸銅表堅剛暴潤不動光晷明潔纖毫愷  
然據大明五年十月十日影一丈七寸七分半十一月  
二十五日一丈八寸一分太二十六日一丈七寸五分  
彊折取其中則中天冬至應在十一月三日求其蚤晚  
令後二日影相減則一日差率也倍之爲法前二日減  
以百刻乘之爲實以法除實得冬至加時在夜半後三

十一刻在元嘉歷後一日天數之正也量檢竟年則數減均同異歲相課則遠近應率臣因此驗考正章法今以臣歷推之刻如前竊謂至密永爲定式尋古歷法並同四分四分之數久則後天經三百年朔差一日是以漢載四百食率在晦魏代已來遂革斯法世莫之非者誠有效于天也章歲十九其疏尤甚同出前術非見經典而議云此法自古數不可移若古法雖疏永當循用謬論誠立則法興復欲施四分於當今矣理容然乎臣

所未譬也若謂今所革卹違舛失衷者未聞顯據有以  
矯奪臣法也元嘉厯術減閏餘二直以襲舊分贏故進  
退未合至於棄盈求正非爲乖理就如議意率不可易  
則分無增損承天置法復爲違謬節氣蚤晚當循景初  
二至差三日曾不覺其非橫謂臣厯爲失知日少之先  
時未悟增月之甚惑也誠未覩天驗豈測厯數之要生  
民之本諒非率意所斷矣又法興始云窮識畧變可以  
刊舊今復謂畧數盈虛不可爲准互自違伐罔識所依

若推步不得准天功絕于心目未詳歷紀何因而立案  
春秋以來十有餘載以食檢朔曾無差失此則日行有  
恒之明徵也且臣考影彌年窮察毫微課驗以前合若  
符契孟子以爲千載之日至可坐而知斯言實矣日有  
緩急未見其證浮辭虛貶竊非所懼法興議曰冲之既  
云冬至歲差又謂虛爲北中捨形責影未足爲迷何者  
凡在天非日不明居地以斗而辯借令冬至在虛則黃  
道彌遠東北當爲黃鍾之宮室壁應屬玄枵之位虛宿

豈得復爲北中乎曲使分至屢遷而星次不改招搖易繩而律呂仍往則七政不以璣衡致齊建時亦非攝提所紀不知五行何居六屬安託冲之曰此條所嫌前牒已詳次改方移虛非中位繁辭廣證自構紛惑皆議者所謬誤非臣法之違設也七政致齊實謂天儀鄭王唱述厥訓明允雖有異說蓋非實義法興議曰夫置元設紀各有所尚或據文於圖讖或取効於當時冲之云羣氏糾紛莫審其會昔黃帝辛卯日月不過顓頊乙卯四

時不忒景初壬辰晦無差光元嘉庚辰朔無錯景豈非  
承天者乎冲之苟存甲子可謂爲合以求天也冲之曰  
夫厯存効密不容殊尚合議乖說訓義非所取雖驗當  
時不能通遠又臣所未安也元值始名體明理正未詳  
辛卯之說何依古術詭譎事在前牒溺名喪實殆非索  
隱之謂也若以厯合一時理無久用元在所會非有定  
歲者今以効明之夏殷以前載籍淪逸春秋漢史咸書  
月蝕正朔詳審顯然可徵以臣厯檢之數皆協同誠無

虛設循密而至千載無殊則雖遠可知矣備閱曩法疏越實多或朔差三日氣移七晨未聞可以下通於今者也元在乙丑前說以爲非正今值甲子議者復疑其苟合無之則推先者將何從乎歷紀之作幾於息矣夫爲合必有不合顧聞顯據以覈理實法興曰夫交會之元則蝕既可求遲疾之際非凡夫所測昔賈逵略見其差劉洪粗著其術至於疎密之數莫究其極且五緯所居有時盈縮卽如歲星在軫見超七辰術家既追算以會今



則往之與來斷可知矣景初所以紀首置差元嘉兼又各設後元者其並省功於實用不虛推以爲煩也冲之既違天於改易又設法以遂情愚謂此治厯之大過也冲之曰遲疾之率非出神怪有形可檢有數可推劉賈能述則可累功以求密矣議又云五緯所居有時盈縮歲星在軫見超七辰謂應年移一辰也案歲星之運年恒過次行天七匝輒超一位代以求之厯凡十法並合一時此數咸同史注所記天驗又符此則盈次之行自

其定准非爲衍度濫徙頓過其衝也若審由盈縮豈得  
常疾無遲夫甄耀測象者必料分析度考往驗來准以  
實見據以經史曲辨碎說類多浮詭甘石之書互爲矛  
盾今以一句之經誣一字之謬堅執偏論以罔正理此  
愚情之所未厭也算自近始衆法可同但景初之二差  
承天之元實以奇偶不協故數無同盡爲遺前設後以  
從省易夫建言倡論豈尚矯異蓋令實以文顯言勢可  
極也稽元曩歲羣數咸始斯誠術體理不可容譏而譏

者以爲過謬之大者然則元嘉置元雖七率斜陳而猶紀協甲子氣朔俱終此又過謬之小者也必當虛立上元假稱厯始歲違名初日避辰首閏餘朔分月緯七率並不得有盡乃爲允衷之製乎設法情實謂意之所安改易違天未覩理之譏者也法興曰日有八成合行一道月有一道離爲九行左交右疾倍半相違其一終之理日數宜同冲之通同與會周相覺九千四十其陰陽七十九周有奇遲疾不及一匝此則當縮反盈應損更

益冲之曰此議雖游漫無據然言迹可檢按以日八行  
譬月九道此爲月行之軌當循一轍環匝于天理無差  
動也然則交會之際當有定所豈容或斗或牛同麗一  
度去極應等安得南北無常若日月非例則八行之說  
是衍文耶左交右疾語甚未分爲交與疾對爲舍交即  
疾若舍交即疾即交在平率八厯七日及二十一日是  
也值交蝕既當在盈縮之極豈得損益或多或少若交  
與疾對則在交之衝當爲遲疾之始豈得八厯或深或

淺倍半相違新故所同復標此句欲以何明臣覽歷書  
古今略備至如此說所未前聞遠乖舊準近背天數求  
之愚情竊所深惑尋遲疾陰陽不相生故交會加時進  
退無常昔術著之久矣前儒言之詳矣而法興云日數宜  
同竊謂議者未曉此意乖謬自著無假驟辨既云盈縮  
失衷復不備記其數或自嫌所執故汎略其說乎又以  
全爲率當互因其分法興所列二數皆誤或以八十爲  
七十九當縮反盈應損更益此條之謂矣總檢其議豈

但臣歷不密又謂何承天法乖謬彌甚若臣歷宜棄則承天術益不可用法興所見既審則應革叛至非景極望非日衝凡諸新說必有妙辨乎



宋文紀卷十五